

HEIMAVIST MA OG VMA

Eyrarlandsvegur 28 • 600 Akureyri • sími 455-1600 • Fax 455-1601
www.heimavist.is • heimavist@heimavist.is • Kt. 630107-0160



Skýrsla fyrir skólaárið 2016-2017

Almennt

Lundur rekur nemendagarða fyrir báða framhaldsskólana á Akureyri; annars vegar í nýbyggingu Lundar og hins vegar í eldri byggingu sem áður hýsti heimavist MA. Byggingarnar eru tengdar saman með björtu og rúmgóðu anddyri.

Lundur er sjálfseignarstofnun sem rekur nemendagarðana á grundvelli þjónustusamnings við menntamálaráðuneytið frá desember 2001. Samningurinn kveður á um að Lundur tryggi íbúum nemendagarðanna frambærilegt húsnæði til búsetu, öruggar og heimilislegar aðstæður ásamt eftirliti með íbúunum auk viðunandi þvottþjónustu og fullnægjandi mótuneytisaðstöðu. Með samningi við mótuneyti MA fól Lundur mótuneyti MA að reka mótuneyti og þvottahús á nemendagörðunum samkvæmt þjónustusamningi Lundar við menntamálaráðuneytið.

Á nemendagörðum Lundar er rými fyrir 333 íbúa og er þá miðað við að tvímennt sé í öll herbergi nýbyggingar, í þrjú stærri herbergi á gömlu vistinni auk níu herbergja á svítum. Hefðbundnu herbergin á gömlu vistinni eru nýtt sem eins manns herbergi á veturna.

Aðsókn

Aðsókn að nemendagörðunum var meiri en hægt var að verða við skólaárið 2016 til 2017 líkt og verið hefur undanfarin ár.

Vegna eftirspurnar er sem fyrr gerð sú krafa gagnvart íbúum sem nýta sér búseturétt hjá Lundi, að þeir skuldbindi sig til að búa á gördunum yfir skólaárið á meðan þeir halda eðlilegri námsframvindu. Góð nýting nemendagarðanna er eðlileg krafa þegar umsóknir um búsetu á gördunum hafa verið töluvert umfram herbergjaframboð. Góð nýting er einnig mikilvæg fjárhagsleg forsenda garðanna. Nemendum sem hætta námi eða falla frá námi er þó unnt að segja upp húsaleigusamningi með stuttum fyrirvara. Gengið er út frá því að ólögráða nemendur beggja skóla hafi forgang svo og nemendur sem sækja sérnám sem ekki er að finna í þeirra heimabyggð eða nám sem er mikilvægt skólunum. Að þessu frátöldu er lausu rými úthlutað í venjulegu hlutfalli 2/3 MA og 1/3 VMA, þó þannig að skólameistarar og framkvæmdastjóri Lundar leysi sameiginlega úr vandamálum, ef upp koma.

Fjöldi íbúa

Þegar heimavistin hóf starfsemi haustið 2016 voru flest öll herbergi nýtt en líkt og áður eiga nokkrar breytingar sér stað á búsetu íbúa fyrstu daga og vikunnar. Ef miðað er við íbúafjölda 1. október 2016 þá voru alls 330 íbúar á heimavistinni eða 173 íbúar í MA og 157 íbúar í VMA.

Kynjahlutfallið skiptist þannig milli skólana: Hjá íbúum VMA voru alls 39% stúlkur og 61% piltar sem er svipað fyrra skólaári. Hjá MA íbúum er hlutfallið líka svipað og fyrra ár eða 59% stúlkur á móti 41% pilta. Kynjahlutfall allra íbúa hefur verið svipað undanfarin ár.

Ef skoðuð er tafla 1 yfir aldursdreifingu íbúa haustið 2016 (miðað við 1. október) voru 71% allra íbúa ólögráða, 75% íbúa MA en 68% íbúa VMA.

Tafla 1 - Aldursdreifing íbúa í október 2016

	Aldursdreifing allra íbúa	Aldursdreifing MA íbúa	Aldursdreifing VMA íbúa
Íbúar fæddir árið 2001	2%	5%	0
Íbúar fæddir árið 2000	39%	46%	32%
Íbúar fæddir árið 1999	30%	24%	36%
Íbúar fæddir árið 1998	19%	17%	22%
Íbúar fæddir árið 1997	8%	8%	8%
Íbúar fæddir árið 1996	1%		1%
Íbúar fæddir árið 1995	1%		1%
	100%	100%	100%

Á hverju skólaári dvelja systkini á heimavistinni en þau fá sérstakan systkinaafslátt af húsaleigunni. Skólaárið 2016 - 2017 bjuggu alls 17 systkini (34 íbúar) á heimavistinni.

Lögheimili nemenda

Íbúar sækja heimavistina víða að af landinu eins og tafla 2 sýnir en hún sýnir flokkun íbúa eftir lögheimilisskráningu í október 2016:

Tafla 2 - Skipting íbúa eftir skólum og lögheimili í október 2016

	VMA íbúar	MA íbúar	Allir íbúar
Suðvesturland og Suðurland	7%	18%	13%
Vesturland	1%	2%	1%
Vestfirðir	4%	1%	2%
Norðvesturland	30%	26%	28%
Eyjafjörður (þ.m.t. Siglufjörður)	20%	22%	22%
Norðausturland utan Eyjafjarðar	26%	20%	23%
Austurland	11%	10%	10%
Erlendis	1%	1%	1%
	100%	100%	100%

Eins og sjá má eru flestir íbúar beggja skólanna frá Norðvesturlandi sem er breyting frá árinu áður þegar flestir MA íbúar voru frá Norðausturlandi utan Eyjafjarðar.

Heimili íbúanna

Nemendagarðar Lundar eiga að vera tryggt og öruggt heimili íbúanna og er kappkostað að svo sé enda mikilvægt fyrir íbúa og foreldra/forráðamenn að haft sé eftirlit með hegðan og líðan íbúanna eins og kostur er. Lögð er áhersla líkt og áður á að íbúar temji sér góða umgengni á vistinni, umhirðu herbergja sinna, virði næðistíma á næturna og að öll meðferð áfengis og fíkniefna sé stranglega bönnuð og varði brottrekstur.

Reglum og eftirliti með hegðan og líðan íbúanna var skólaárið 2016-2017 líkt og undanfarin ár fylgt eftir með uppbyggilegum ábendingum og afskiptum eftir þörfum.

Hjúkrunarfræðingur hafði líkt og fyrri skólaár reglulega viðtalstíma á heimavistinni tvisvar í viku, klukkustund í senn og veitti íbúum aðstoð og liðsinnti um frekari heilbrigðisþjónustu ef á þurfti að halda. Haldin var brunaæfing á skólaárinu sem tókst með ágætum en mikilvægt er fyrir íbúa jafnt sem starfsmenn að æfa rýmingu á húsnæðinu ef á þarf að halda. Eftir rýmingu heimavistarinnar söfnuðust íbúar saman í Kvosinni í MA þar sem starfsmenn frá eldvarnaeftirlitinu fóru yfir hvernig til hefði tekist og hvað þyrfti að bæta.

Undanfarin skólaár hafa íbúar heimavistarinnar ásamt starfsfólki tekið á móti grunnskólanemendum og kennurum þeirra úr nágrennabyggðalögunum. Heimsóknin er skipulögð í samstarfi við námsráðgjafa MA og VMA og felst í kynningu á heimavistinni. Á skólaárinu var tekið á móti rúmlega 200 nemendum úr 8. 9. og 10. bekk frá 12 skólum úr nágrennabyggðalögunum og fengu þau kynningu á heimavistinni. Að lokinni kynnisferð um húsnæðið var endað á setustofunni þar sem gestir gæddu sér á veitingum og spjölluðu við starfsmenn og íbúa. Vel tókst til með kynninguna og hefur reynslan sýnt að þessar kynningar sem íbúar heimavistarinnar taka þátt í eru að skila sér.

Í mars tók Heimavistin þátt í 3ja daga Framhaldsskólakynningu sem haldin var í Laugardalshöllinni og var af því tilefni útbúið kynningarefni fyrir heimavistina. Á skólaárinu var einnig sett af stað Facebook síða fyrir heimavistina sem notuð hefur verið til að koma á framfærum fréttum og öðru úr starfseminni. Helst er horft til þess að ná til foreldra og forráðamanna og hefur reyslan sýnt að hún hefur verið þó nokkuð notuð af þeim markhópi auk íbúanna sjálfra.

Hagsmunamál íbúa

Íbúar kjósa sér hagsmunaráð heimavistarinnar, öðru nafni heimavistarráð. Heimavistarráð starfaði með framkvæmdastjóra og öðrum starfsmönnum og vann að framgangi sameiginlegra hagsmunamála íbúanna. Heimavistarráð skipulagði einnig félagsstarf og vann að undirbúningi viðburða á heimavistinni. Á skólaárinu 2016-2017 stóð heimavistarráð fyrir líkt og áður: kvikmyndasýningu, jólaföndri, laufabrauðsgerð, jólahlaðborði og páskabingó.

Agamál

Í samstarfi við skólameistara hefur Lundur mótað skýrar vinnureglur um meðferð og afleiðingar áfengisagabrota á heimavistinni. Viðurlögin við áfengisagabrotum fara eftir eðli brotanna en drykkja íbúa á görðunum er brottrekstrarsök. Þá hafa einnig verið mótaðar vinnureglur um meðferð og afleiðingar vímuefnanotkunar sem eru alvarlegustu brot á agareglum nemendagarðanna. Áhersla hefur verið lögð á samstarf við foreldra og forráðamenn þegar slík mál koma upp.

Reglur heimavistarinnar voru endurskoðaðar á árinu líkt og árinu áður til að styrkja frekar stöðu Lundar og skólameistara til að fylgja eftir ákvörðun um reglusemi og umgengni.

Skipulags- og rekstrarmál.

Alls störfuðu níu starfsmenn á skólaárinu 2016-2017: Tveir öryggisverðir á næturvakt, tveir starfsmenn á skiptum vöktum á daginn og kvöldin, einn starfsmaður á morgunvöktum og tveir starfsmenn sem sáu um öryggisvörslu, þrif o.fl. um helgar. Auk þjónustustjóra og framkvæmdastjóra. Tveir starfsmenn létu af störfum sökum aldurs og voru tveir öflugir starfsmenn ráðnir í þeirra stað.

Á árinu unnu nokkrir íbúar á heimavistinni yfir vetrartímann. Starfið fólst í ýmis konar aðstoð við starfsmann á vakt s.s. við að ryksuga, fylla á lagera o.s.frv. Tveir til þrjú íbúar störfuðu yfir vetrartímann og unnu að jafnaði alls 2-4 klst. á viku.

Af viðhaldi og endurbótum á húsnæði má nefna að lögð voru ný gólfteppi á ganga nýju vistarinnar, lokið var við að endurnýja rúmdýnur á herbergjum, frárennislögn undir sal mötuneytis var fóðruð, gólfefni endurnýjuð á herbergjum og að lokum var sett upp nýtt lyklakerfi á nýju vistina í byrjun sumars 2017.